

Mi'n Tin Tempu

Un hende a kalkulá kon un persona averahe di 70 aña di edat a gasta e añanan di su bida. Esaki ta su kalkulashon.

Drumi	23 aña	32,9%
Trabou	16 aña	22,8%
Televishon	8 aña	11,4%
Kome	6 aña	8,6%
Biaha	6 aña	8,6%
Dibertí	4½ aña	6,5%
Enfermedat	4 aña	5,7%
Bistimentu	2 aña	2,8%
Religion	½ aña	0,7%
TOTAL	70 aña	100%

Talbes e lista aki no ta harmonisá ku bo patronchi di biba (p.e. e persona aki ta biaha 31 dia kada aña di su bida i ta drumi 8 ora tur anochi). Sinembargu e kalkulashon ta pone nos para ketu evaluá nos uso di nos tempu.

Nos tur mester tin tempu pa rilèks. Ma pensa un ratu. Ora ta tempu pa muri, lo bo deseá ku un di bo lógronan mas grandi ta ku bo a dediká 8 aña di bo bida pa televishon? Bo lo alkansá e meta dudoso ei si bo ta gasta 2½ ora kada dia dilanti televishon.

Kon lo bo deseá pa e “grafiek” di e añanan di bo bida parse ora bo tin 70 aña? No ta pusíbel pa kambia e añanan ku bo ya kaba a gasta. Ma bo por hasi algu pa ku e añanan benidero!

Si banko a pone fl. 86.400 na bo kuenta kada mainta i siguiente mainta a tuma bèk loke bo no a usa durante dia, kiko lo bo hasi? Sin duda lo bo usa kada florin!

Tin un banko asina! Kada dia Dios ta pone 86.400 sekòndu na bo kuenta i kada anochi E ta tuma bèk loke bo no a usa.

Tur hende ta haña 24 ora pa dia—nada mas, nada ménos. Bo no por kumpra mas tempu. Bo no por spar tempu. Bo no por rèk tempu. Bo no por remplasá tempu. Bo no por pone tempu para. Ta gasta so bo por gast'è. i ta un chèns so bo ta haña pa gast'è. **E pregunta importante ta kon bo ta us'è.**

Ayera ta un chèk kanselá. Mañan bo no por kobra ainda. Awe—awor—ta tur loke bo tin. **Usa bo tempu prudente!**

Ku regularidat nos ta bisa, “Mi' tin tempu”. Ma en realidat, **bo tin tempu pa hasi loke bo KE hasi**. Ta notabel ku e mésun persona ku ta afirmá ku e no tin tempu pa lesa, bai misa, hasi siertu sita, èts. tin tur klase di tempu pa fiesta, televishon, keiru, èts. Nan no tin tempu, pasobra nan no KE tin tempu!

E pregunta prinsipal ta **kiko ta bo prioridat?** Prioridatnan ta determiná kon bo ta usa bo tempu. No krusa man, sinta warda pa bo **haña** tempu pa hasi siertu kos. Nunka lo bo **haña** tempu. Bo tin ku repartí bo tempu segun bo prioridat...**traha tempu**. Bon kontakto ku bo yunan ta importante; **traha tempu** pa kombersá ku nan. Si bo meta ta edukashon, lo bo **traha tempu** pa lesa, studia, siña. Si bo prioridat ta pa bo tin bon kontakto ku Dios, bo tin ku **traha tempu** kada dia pa orashon, lesa Beibel, i evaluá bo bida a base di loke bo a lesa.

Ta prudente pa nos tur ku regularidat evaluá bon nos uso di tempu. Beibel ta konsehá nos pa “..*mira bon kon boso ta kana* (esta, kondukta), *no manera hende bobo, ma manera hende sabí, haciendo bon uzo di boso tempu, pasobra e dianan ta malu*” (Efesionan 5:15-16). Ku esaki na bista, ta na su lugá pa nos pidi Dios pa “.., *siña nos kontá nos dianan, pa nos por presentá na Bo un kurason yen di sabiduria*” (Salmo 90:12).

Ta bisá ku dos kos so ta importante na fin di bida: bo lasonan familiar i bo relashon ku Dios. No posponé awe loke mañan lo bo deseá ku bo a hasi ayera. Traha tempu! Ora bo tin ku duna kuenta dilanti Dios, E lo no aseptá e ekskusa, “Mi'n tabatin tempu!”